

横塘谭氏六修族谱序

尝观古近名门巨族之辑修家乘也，大都以相距三十载为度，此乃恐年深代远，族姓后裔迁徙靡定，访问难周，修纂或不免遗误之憾，此所为酌古准今，循修谱牒，各姓类然耳。

我上湘横塘谭氏族谱自清宣统五修后，历今三十年，生龄日繁而星散异常，如远在秦陇者有之，散居宁乡等处者有之；况兹世界战云弥漫之秋，难保离乱之后不易清纪，故族之逊心，敬宗收族者，咸以续修谱牒为急务，于是聚族合谋，见丁派费，量富增输，设局修纂，并推予与伯庸贤阮量其事，予已年逾六旬，精力衰颓，恐难负此重任，固辞未获，遂竭绵薄，相与参赞其间，幸同事诸公，矢勤矢慎，分任合作，越数月而草谱已成。

盖我横塘族谱前此已历五修，而历修各届谱牒之先人均贤才辈出，先世之渊源，列祖之法戒遗规，

早经考正刊载，本届续修悉仍其旧，事简而成功速也，唯族之繁衍，居址远近不一，昭穆嫡庶甄别，生歿葬勺之登记，难免错误，嘱各房负责人员详加校正后再行付梓，以昭慎重。若夫阐扬光大，扩充篇幅，则待后日人文蔚起，续继修辑，以俾永垂汗简，斯固非独合族所共期，亦祖先在天之灵所厚望（等）尔，是为序。

民国二十七年戊寅孟春吉日

四十一派孙平池景星敬撰

四十二派孙礼积伯庸谨书